



Икона Пресвятой Богородицы Песчанская
(на этой иллюстрации изображен чудотворный образ,
который находится в Николо-Иоасафовском соборе)

Кондак 1

Взбранной воеводе, всего мира Утешительнице и Надеждо спасения рода христианского, к Тебе припадаем во вся дни жизни нашей, яко к источнику всех духовных дарований и молим Тя: услыши нас, вопиющих к Тебе в часы дневных и ночных, в болезнях и скорбех, в нуждах и напастех всегда в радости зовущих: Радуйся, Владычице мира, иконою Твоею Песчанскою сердца наша утешающая.

Икос 1

Ангелом Предстателем наченши, восхваляет Тя, Матерь Божию вселенная вся, яко Ты еси свет просвещения разума нашего, Ты Посредница между нами и Богом, Твои матерния молитвы много могут пред престолом Вседержителя, Ты десницею Своею приводиши нас от земли к небеси, Ты неизглаголанное и непостижимое спасения нашего сокровище, и сего ради не вемы грешнии, киими похвалами воспети благодарная Тебе, но прими от сердец наших величания сия:

Радуйся, в райской радости всегда пребывающая.

Радуйся, таковую радость нам желающая.

Радуйся, любящих Сына Твоего чадами Своими именующая.

Радуйся, в истинной вере нас сохраняющая.

Радуйся, от ереси и расколов нас защищающая.

Радуйся милосердия Божия нам Ходатаице.

Радуйся о продлении жизни на земле Сына Своего умоляющая.

Радуйся за умерших всех без покаяния выну скорбящая.

Радуйся с Ангелом – хранителем Хранительнице наша усердная.

Радуйся, на Страшном Суде Сына Твоего едина Надеждо на спасение наше.

Радуйся, Владычице мира, иконою Твоею Песчанскою сердца наша утешающая.

Кондак 2

Видеши, о Препоблагословенная Мати Божия, како велико беззаконие рода человеческого и того ради попусти Господь на землю и живущих на ней глады, моры, трусы, сухости и потопления. Ты же, Всемилостливая, умоли Всеблагото Бога да удалит от рода сего фараонитское жестокосердие, и да будет он покорен деснице Господней, да придет в совершенное покаяние, возопив Ему согласно: Аллилуия.

Икос 2

Разум совершенный небеснаго вестника Гавриила, благовествующего Тебе волю Божию, яко Тебе единой быти блаженней в женах Матери Сына Божия. Яко Сам Бог Отец изрек сатане, искусившему наших прародителей: семя жены сотрет главу змия, чесого ради обетования Тебе чаяша вси народы. Ты же Сама предрекла еси, яко ублажат Тя вси роды и от того часа вопиют Тебе святое хваление сицевое:

Радуйся, от Превечнаго Бога всего мира избранная Отроковице.

Радуйся, Вместилище, Спасителя Бога во утробу Свою приемшая.

Радуйся, Материю Того от Господа наименованная.

Радуйся, от того же времени весь мир Богоматернею любовью покрывающая.

Радуйся, неусыпающая Молитвеннице и Ходатаице наша пред престолом Божиим.

Радуйся, живых Надеждо и усопших упование в страшный час суда Божия.

Радуйся, к доброму ответу за жизнь нашу на Страшном Суде нас приуготовляющая.

Радуйся, от рождества до разлучения души от тела нашего, нас не оставляющая.

Радуйся, в радость вечную богоизбранных приводящая.

Радуйся, за скорби временныя в палатах вечных ликующая.

Радуйся, Владычице мира иконою Твоею Песчанскою, сердца наша утешающая.

Кондак 3

Сила Вышняго спасе мир от потопления греховнаго воплощением от Тебе Сына Божия, Царице Небесная, ибо враг рода нашего, диавол, восхоте погубити в отчуждении от истинного Бога весь род человеческий, в беззаконии и идолослужении ходити поучая. Господь же разрушил есть сети его посланием в мир Сына Своего Единороднаго и Тя, Матерь Чистую, дарова Ему, да побеждена будет сила вражия и да обратятся вси людие ко Творцу Своему и Богу, возопив Ему: Аллилуиа.

Икос 3

Имуще таковую Посредницу спасения рода нашего, молящися непрестанне взывати к Тебе: буди же нам ограждение и стена крепка и необоримая, сохраняй нас в вере православной отеческой во вся дня жизни нашея. Научи нас быти покорными чадами Церкви Сына Твоего, юже стяжа Кровию Своею Честною. Сподоби нас благодарными бытии Богу за великия милости Его, научи исполняти заповеди Его и уставы святоотеческия, направляй нас, Всеблагая Мати, на путь спасения. Избави нас от греха и гнева Божия, и наказания вечнаго за еже воспевати Тебе благодарения таковая:

Радуйся, на небесах царствующая и нас доле не оставляющая.
Радуйся, всех радостей неисчерпаемый Источник.
Радуйся, горечь жизни наша улаждающая.
Радуйся, недремлющая Покровительнице, нас же спящих сохраняющая.
Радуйся, на труды дневные нас благословляющая.
Радуйся, благодарения Богу приносить нас научающая.
Радуйся, во дни праздников на путь к храму Божию стопы наша направляющая.
Радуйся, житейское попечение во дни святых оставляти повелевающая.
Радуйся, за непочитание дней святых наказующая.
Радуйся, сладчайшим учением Сына Твоего, яже есть едино на потребу, души насыщающая.
Радуйся, Владычице мира, иконою Твоею Песчанскою сердца наша утешающая.

Кондак 4

Бурю различных скорбей и страданий утоляти хотяще, людие Вознесенския церкви и вси окрест живущие слышаша о велицей силе благодатней, исходящей от иконы Богоматери во граде Изюме, притекоша и припадающее к ней с радостию великою, яко к Самой сущей Царице Небесной, град сей и живущих в нем зело возлюбившей и благодатным светом от иконы Своея Песчанския озарившей. Имуще же вси едину надежду на Тя, Пречистая, и в веселии сердец возопиша Богу: Аллилуиа.

Икос 4

Слышаша людие вси, яко верный Богу и Тебе, Богомати, служитель Твой святитель Иоасаф, узрев во сне икону Твою в неведомом храме в сорном месте лежащую, и лучезарное сияние из нея исходящее, потщася воспоминанием чудного видения, направить стопы своя на путь искания святыни сея во всей обширной епархии своей. Егда же града Изюма достиже, вшед в церковь, виде икону Твою, Богомати, в притворе угли кадилыны ограждающую, и абие воспомяну есть нощное видение и благодать от нея исходящую ощути. Долго с умилением, взирая на лик Твой и осенив себя крестным знамением, смиренно пад на колени пред нею громогласно молящеся: «Царице Небесная! Прости небрежность Твоих служителей, не ведят бо, что творят». Тебе же Самой во умилении сердца возопи таковая:

Радуйся, икон Своих чудотворных Хранительнице усердная.
Радуйся, в сонных видениях от икон Своих многим силу благодатную показующая.
Радуйся, ветхия иконы лучезарным сиянием обновляющая.
Радуйся, христианам, в бедах сущим, ко святым иконам Твоим обращаться повелевающая.
Радуйся, святителя Иоасафа с ранней юности возлюбившая.
Радуйся, ему же чудотворную силу в иконе Твоея Песчанской открывшая.
Радуйся, первыя его моления пред святыней сей приявшая.
Радуйся, его же душу со всеми святыми на небо преселившая.
Радуйся, его же святых мощи чудотворною силою обогатившая.
Радуйся, Святителя Иоасафа, молитвенника за Русь святую на небо избравшая.
Радуйся, Владычице мира, иконою Твоею Песчанскою сердца наша утешающая.

Кондак 5

Яко боготечную звезду восприимше людие изюмские икону Твою от рук святителя, потщашася новый храм Богу устроити, и бысть между создателями его распря на время некое. Но из загробного мира некая умершая жена Екатерина, трижды являясь своему богатому мужу в сонном видении с чудотворною иконою Богоматери Песчанскою, повелела ему оставити скупость свою, ея же ради погибель души его бысть, и соорудити храм на богатство свое. Он же со страхом приняв вразумление свыше на сие. Созда храм в честь Вознесения Сына Твоего, Пречистая, и в веселии сердца возопи Богу: Аллилуиа.

Икос 5

Видевши исполнение Промысла Божия на себе во обретение святыни Песчанския, пребысть святитель Иоасаф во граде Изюме три дня и три ночи, по всяк час вознося в церкви благодарственное молебное пение пред пречистым образом Богоматери, за еже удостоился чудного видения глас слышати от него: «Сею иконою Пресвятая Владычица являет особое знамение Своего заступничества для града сего и страны целыя», - сего ради возопи Богородице:

Радуйся, иконою Песчанскою, якоже и первоначертанною святым Лукою благодатию Твоею и Рождшагося от Тебе обогатившая,

Радуйся, сердца наша неизреченною радостью наполняющая.

Радуйся, во граде Изюме, аки втором Назарете с нами незримо пребывающая.

Радуйся, иконам Своим силу чудодетствовати дарующая.

Радуйся, земных и малодушных нас не оставляющая.

Радуйся, печаль житейскую от сердец наших прогоняющая.

Радуйся, безродных сирот Своим Покровом и благодатию сохраняющая.

Радуйся, несчастных увечных и обездолженных омофором покрывающая.

Радуйся, невинно осужденных и оклеветанных к вечной правде приводящая.

Радуйся, жизненный крест, данный нам волею Божею, нести нам помогающая.

Радуйся, Владычице мира, иконою Твоею Песчанскою сердца наша утешающая

Кондак 6

Бысть некий учитель во граде сем Изюме у него же младенцы друг за другом умираша. Егда же последний бысть одержим болезнью велией, взявше родители его и несоша к иконе Твоей, Богомати, имуще едину надежду на Тя. Еще же на пути сущу конец постиже младенца сего. Но родители его, имуще великую веру Тебе, Пречистая, положиша младенца умершаго пред иконою Твоею. Во время же пения молебнаго начаша со слезами и воплем горьким взывати: «Мати Божия, помози нам, спаси чадо наше». Ты же, Всемилостливая, видя твердую веру их и упование на Тя, возвратила жизнь младенцу, тогда же и людие, окрест стоящие, в радости неизреченной прославляху Тя, Пречистая, и Вседержителя Господа хваляху песней: Аллилуиа.

Икос 6

Новое чудо показа Царица Небесная, егда во время пения «О Всепетая Мати» воскресшему младенцу уста откры и повелела еси ему велиим гласом воздати хвалу Тебе. Все же зряще знамение сие во умилении сердечнем возопиша Тебе таковая:

Радуйся, умерших оживление.

Радуйся, рыдающих родителей увеселение.

Радуйся, чудесами от иконы Твоя к Себе призывающая.
Радуйся, из пропасти неверия светом разума Евангелия восхищающая.
Радуйся, Подательнице утешения унывающим.
Радуйся, Небесная Воспитательнице, детей наших страху Божию и целомудрию научающая.
Радуйся, у Сына Твоего и Бога нашего обилие всяких благ нам испросившая,
Радуйся, во время страдания Сына Твоего оружие скорбное в душу Свою приившая.
Радуйся, на умирающего Сына Твоего на Кресте за грехи мира взирающая.
Радуйся, и нас на смертном одре не оставляющая.
Радуйся, Владычице мира, иконою Твоею Песчанскою сердца наша утешающая.

Кондак 7

Хотяще явити ко всем приходящим милосердие Свое и гнев Свой на служителя алтаря Господня, уже во искушение впадши от врага рода человеческого завистию мучим, дерзнув запретити молебное пение Царице Небесной пред иконою Ея всем жителям в весех живущим, порази его Мать Божия лютою болезнию. Он же, осознав грех свой и силу гнева Божия, егда принесоша его на одре и положиша пред чудотворным образом, начаша молити Богородицу: «Мати милосердная, прости ожесточение сердца моего и воздвигни от одра болезни». По окончании же пения молебнаго исцеление восчувствовав, восстав, облобыза честный образ Твой, со слезами благодарно вопия Богу: Аллилуиа.

Икос 7

Возсия светом знамений и чудес, егда принесена бысть икона Твоя чудотворная, Богомати, в новый созданный храм. Люди верныя стекахуся со всех окрест жилищ своих и наполняху не токмо храм, но и ограду церковную и вси аки усты праведныя Елизаветы взываху: «Откуда нам сие, да прииде Мати Господа нашего во град Изюм», — да в радости духовной взываху Тебе сицевая:

Радуйся, первейшая Помощнице в создании храма нашего.
Радуйся, обогатившая оный иконою Твоею чудотворною.
Радуйся, Небесная Госпоже граду Изюму, яко же и многим градовом страны нашея чудотворную икону давая.
Радуйся, многих жителей града сего и весей, унылых, скорбных и в бедах сущих благодатию от иконы Твоя возвеселившая.
Радуйся, град наш Покровом Твоим присно покрывающая.
Радуйся, маловерных и неверных чрез чудодейственную силу от иконы Песчанския к вере в Бога приводящая.
Радуйся, Богоматернею любовью нас согревающая.
Радуйся, нас на Твой образ яко на живую Мать Бога нашего очима веры взирающих сохраняющая.
Радуйся, приемлющая нас, яко едину надежду на Тя имущих на помилование у Бога и спасение Тобою чающих.
Радуйся, по благодати, яко же и Сын Твой, везде Сушая и всякое прошение верных своих исполняющая.
Радуйся, Владычице мира, иконою Твоею Песчанскою сердца наша утешающая.

Кондак 8

Странно и сумнительно неверующим слышати, о Преславная Мати Царя Небесного, како на Твой святыи образ вернии людие очима своима и умиленными душами взираху, и от всех скорбей избавляются и от бед сохраняются. Премилосердная Мати Божия, не точию телесныя недуги исцеляеши, но и беснующемуся лета многи от иконы Своея Песчанския вражию силу прогнала еси. Буди же нам, Всеблагая, Ходатаицей о спасении нашем да вечно славим Тя со всеми небожителями, вопия Богу хвалебную песнь: Аллилуиа.

Икос 8

Вся бывши горе, и земных не оставявши, о Всеблагая и Всемиловитая Мати Божия, Ты же яко и Сын Твой, не хочещи смерти грешнику, но еже обратитися и живу быти ему. За таковую милость Твою взываем вси Тебе:

Радуйся, иереев Божиих вразумление.

Радуйся, временно наказующая и вечно милующая.

Радуйся, в болезнех сущих к Себе призывающая

Радуйся, пастырям Церкви о величии благодати священства всегда напоминающая.

Радуйся, надежду имущих на Тя никогда не посрамляющая.

Радуйся, расслабленным телесне и духовне скорое врачевание подавающая.

Радуйся, во всякой беде и нужде нас не оставляющая.

Радуйся, исцелениями родителей детям радость возвращающая.

Радуйся, умирающим детям здравие дарующая и родителей от печали избавляющая.

Радуйся, в конце мира всем деснаго стояния желающая.

Радуйся, Владычице мира, иконою Твоею Песчанскою сердца наша утешающая.

Кондак 9

Всякое естество ангельское удивися о неописуемом море чудес, изливаемом от икон Твоих, Богородице. Помазанием елея от лампы горящей пред святою иконою Твоею Песчанскою, Ты некоторой болящей Анне исцеление руки даровала еси. Тя ублажают вси роди, Тя величают вся Небесныя силы, и мы земнороднии Тебе едину ограду и утешение в жизни сей временней прославляюще Тебе и Сыну Твоему вопием: Аллилуиа.

Икос 9

Ветия многовещанная не могут воспети достойно тайны Твоего Владычице, строения спасения человеков, егда за беззакония людей Господь попусти велицей болезни во граде Изюме быти и во всех весех его, и множество людей погибоша. Страх же нападе на всяк возраст, темже взяша Пречистый образ Твой, несоша его освящения ради улиц и домов с молитвою слезною взываючи: «О, Всеблагая Целительнице, спаси нас от смерти лютыя». Ты же, Всемиловитая, укротила бурю смертную, люди же научила благодарственно воспевати Богу славу подобающую, Тебе же Самой взывати сице:

Радуйся, покаянными слезами души наша от греховныя скверны очищающая.

Радуйся, оставленных врачами с омертвением удес оживлением от иконы Песчанской радости велия сподобляющая.

Радуйся, радость в дома наша приносящая иконою Своею Чудотворною.

Радуйся, родителей милующая и детей сохраняющая.

Радуйся, слепца из града Воронежа во град Изюм призвавшая и от иконы Своея

чудотворная зрение ему даровавшая.

Радуйся, Врачебнице наша Всемилосердная, недуги наша туне исцеляющая.

Радуйся, нас ради Небо оставляющая и в скорби сущим на земли помогающая.

Радуйся, и в самый час кончины страдания наша утешающая.

Радуйся, Поборнице наша, на рати злобных сил поднебесных.

Радуйся, в адских мучениях томящихся о спасении их Сына Своего умоляющая.

Радуйся, Владычице мира, иконою Твоею Песчанскою, сердца наша утешающая.

Кондак 10

Спасти хотя люди своя от зол многих, даровала еси икону Твою, Владычице, слепым — в прозрение, хромым — в хождение, расслабленным — восстание, беснующимся — в исцеление, гордым — в смирение, нераскаянным — в покаяние, всем коегождо недуга — исцеление, зол и скорбей, и болезней отгнание, градов — утверждение, земли — плодоносие, за няже от земнородных не возможет достойно восхваляти Тя по величеству милости Твоя к роду человеческому. Но мы любовь понуждаемы дерзаем взывати Богу, усыновившему нас Тебе при Кресте Своем и даровавшему нам такую Путеводительницу на небо, поя Ему: Аллилуиа.

Икос 10

Стена еси всем прибегающим к Тебе, Дево, всегда являющаяся и почитателю иконы Твоя Игнатию, имевшему благое намерение посетить святой град Иерусалим и святую Землю, юже освяти Господь стопы Своими, Помощницей явилася еси, егда он, падши пред образом Твоим, просяще на путь благословения и помощи Твоя Ты же, Всещедрая, неотложно чрез рабу некую обильную помощь денежную подала еси ему, да исполнит благое желание свое. Он умиленно душею вознесе Тебе благодарственное хваление сицевое:

Радуйся, добрые намерения благословляющая.

Радуйся, на путь к Царствию Небесному нас наставляющая.

Радуйся, в Небесном Иерусалиме жизни вечной всем желающая.

Радуйся, к благочестию и целомудрию жизнь нашу наставляющая.

Радуйся, бракосочетающимся на верную супружескую жизнь иконами своими благословляющая.

Радуйся, непокорным и враждующим чадам Церкви, Страшным Судом грозящая.

Радуйся, благотворителей и украсителей святых храмов небесною красотой вознаграждающая.

Радуйся, за ленивых и не радивых о спасении своем зело скорбящая.

Радуйся, любящих Тя и Сына Твоего милостию Своею покрывающая.

Радуйся, о Госпоже Ты наша Мати Божия и Мати всех матерей и всего рода христианского.

Радуйся, Владычице мира, иконою Твоею Песчанскою сердца наша утешающая.

Кондак 11

Пение хвалебно благодарственное приносяще Тебе, Владычице, вемы какую скорбь приносим мы грешнии Сыну Твоему отступствы своими, маловерием, суеверием и прочими грехами. Молити убо Тебе, Всемилостивая, не престанем. Своим предстательством и ходатайством пред престолом Божиим соедини нас во Святей

Соборной и Апостольской Церкви, да будем вси едино, яко же Отец, Сын и Святыи Дух, да в единстве веры воспеваем Богу: Аллилуиа.

Икос 11

Яко светоприемную свещу явила еси, Владычице, икону Твою во граде сем Изюме, источник благодатной воды открыла еси подле храма Сына Твоего, идеже икона Твоя чудотворная Песчанская пребывает. Слепорожденному младенцу прозрение от нея даровала еси, за еже людие от времени того почерпают благой дар сей на пользу душевную и телесную. Тебе же Самой Владычице от усердия своего взывают:

Радуйся, чудотворною силою водный источник донине сохраняющая.

Радуйся, воды кроплением вражюю силу от домов и семейств наших отгоняющая.

Радуйся, яко же от иконы, тако и от источника великия щедроты верным дарующая.

Радуйся, безматерних младенцев Сама Матерь их присносушная.

Радуйся, скитальцев не имущих покрова земного, Обитель для них небесную приготавливающая.

Радуйся, в лютых болезнях к Тебе вопиющих терпение им ниспосылающая.

Радуйся, гонимых, в темницах томимых за любовь с Сыну Твоему и Богу нашему небесною радостью утешающая.

Радуйся, за охлаждение веры, попрание славы Божией выну скорбящая.

Радуйся, к долготерпению и милосердию о грешном мире Господа Сил умоляющая.

Радуйся, во время жизни земной все скорби мира сего познавшая.

Радуйся, Владычице мира, иконою Твоею Песчанскою сердца наша утешающая.

Кондак 12

Благодать исходит всегда, Пречистая, от иконы Твоея Песчанския, яко непобедимая Воевода на враги наша, видимая и невидимая, нечистыя духи прогоняеши, враждующих миром и любовию умудряеши, непокорных наказуеши, раздоры семейныя союзом любве связуеши, неведущих и неверующих на путь истинный наставляеши, мы же прославляя Тя, Всеблагую Помощницу в жизни нашей, благодарно воспеваем Богу: Аллилуиа.

Икос 12

Поюще Твое из древних времен дивное защищение Отечества нашего, егда постигоша его глады и моры, огонь и опустошение, нашествия иноплеменных и междуусобныя брани, у Тебе, Владычице, отцы и матери и малыя дети со слезами помощи просяще. Ты же, Всеблагая, спасение даровала еси неотложно, покрывала Покровом Своим Отечество наше. Мы же Тебе, Избавительнице нашей, со умилением приносим сие благодарение и похвалы сия:

Радуйся, правоверных верная Хранительнице.

Радуйся, правыя брани Споборнице.

Радуйся, христианских обителей и всех святынь Хранительнице.

Радуйся, о Отечестве нашем пред Богом Молитвеннице.

Радуйся, ко Отечеству нашему небесному нас путеводствующая.

Радуйся, во времена нашествия иноверных наша Освободительнице.

Радуйся, во время глада наша Кормительнице.

Радуйся, и в радостях житейских Ты нас благоразумию научающая.

Радуйся, Всемиловитая Молитвеннице, мира миру у Бога умоляющая.

Радуйся, Свете наш прекрасный и вечный.
Радуйся, Владычице мира, иконою Твоею Песчанскою сердца наша утешающая.

Кондак 13

О, Всепетая Мати, прими от нас благодарное пение сие, Тебе возносимое. Прости нам, Всемилосердная, яко по немощем нашим не возмогохом изглаголати всех благодеяний от иконы Твоя Песчанской. Но буди с нами в жизни сей и Ходатаицей пред Богом о жизни вечной, да всегда благодарно восхваляем Тя и Богу вопием: Аллилуиа.

(Этот кондак читается трижды, затем 1-й икос: **Ангелом Предстателем наченши...** и 1-й кондак:

Взбранной воеводе, всего мира Утешительнице

...
)

Икос 1

Ангелом Предстателем наченши, восхваляет Тя, Мать Божию вселенная вся, яко Ты еси свет просвещения разума нашего, Ты Посредница между нами и Богом, Твои матерняя молитвы много могут пред престолом Вседержителя, Ты десницею Своею приводиши нас от земли к небеси, Ты неизглаголанное и непостижимое спасения нашего сокровище, и сего ради не вемы грешнии, киими похвалами воспети благодарная Тебе, но прими от сердец наших величания сия:

Радуйся, в райской радости всегда пребывающая.

Радуйся, таковую радость нам желающая.

Радуйся, любящих Сына Твоего чадами Своими именующая.

Радуйся, в истинной вере нас сохраняющая.

Радуйся, от ереси и расколов нас защищающая.

Радуйся милосердия Божия нам Ходатаице.

Радуйся о продлении жизни на земле Сына Своего умоляющая.

Радуйся за умерших всех без покаяния выну скорбящая.

Радуйся с Ангелом – хранителем Хранительнице наша усердная.

Радуйся, на Страшном Суде Сына Твоего едина Надеждо на спасение наше.

Радуйся, Владычице мира, иконою Твоею Песчанскою сердца наша утешающая.

Кондак 1

Взбранной воеводе, всего мира Утешительнице и Надеждо спасения рода христианского, к Тебе припадаем во вся дни жизни нашей, яко к источнику всех духовных дарований и молим Тя: услыши нас, вопиющих к Тебе в часы дневных и ночных, в болезнях и скорбех, в нуждах и напастех всегда в радости зовущих: Радуйся, Владычице мира, иконою Твоею Песчанскою сердца наша утешающая.

Молитва

О Премилостивая и Премилосердная Мати Божия, Покровительнице града нашего Изюма и страны нашея, купно же и всего мира Молитвеннице, прими коленопреклонения ума и сердца нашего и услыши молитвы во умилении душ наших Тебе возсылаемая: умилосердися, о Всепетая Мати, прими молитвы Тебе возносимыя, якоже издревле принимала еси молитвы, любящие зде, пред иконою Твоею возносимыя.

Помози нам в побеждении прелестей и соблазнов мира сего, не попусти нам отверженным быти вечного небесного блаженства. Ты едина наша радость и утешение в жизни сей временней. Ты едина наша надежда в жизни вечной. Веруем, яко Ты Своею Богоматернею любовью и снисхождением удостоиши нас с Собою вожделенного Царствия Сына Твоего. Тебе убо просим: не отступай от нас, Всеблагая, защищай от всех козней вражиих. Не допусти нам погибнути чрез грехи наша, не лиши нас милосердия Божия; изжени из нас леность в молитве и в посещении храма Божия; избави нас от малодушия, уныния, вражды, гнева, подозрения, зависти, клеветы, ненависти и гордости бесовския. Вразуми поправших заповеди Церкви Христовой. Семействам нашим даруй мир и крепкую любовь, да согласно поживут родители и дети. Да живет в стране нашей правда Божия и да сохраняются в народе нашем святоотеческия обычаи. Вознеси, о Всеблагая, усердныя молитвы наша пред Богом о всего мира умирении, да не погибнет род человеческий в пламени опустошения всемирнаго, да познают вси людие Отца Своего Небеснаго и Тя, Пречистую Матерь Божию, Заступницу рода христианскаго. Приведи вси народы к истинному покаянию и исправлению греховныя жизни, да не будет для нас безответным день Страшнаго Суда Божия, но да сподобит нас Господь с Тобою вечныя радости небесныя, Емуже подобает всякая слава, честь и поклонение Отцу и Сыну и Святому Духу ныне и присно и во веки веков. Аминь.

Тропарь

глас 4-й

О Пречудная, Препоблагословенная Мати Христа Бога нашего! Лунезарным небесным светом от иконы Своея Песчанской град Изюм и люди страны нашей Тебе присно озаряеши. Руце Свои Пречистыя к Тебе молящим простираеши. О Всеблагая Ты многотекущая река божественной благодати. Ты нас под покровом Своим сохрани, Сына Своего о нас моли и в горний Иерусалим введи.

Кондак

глас 8-й

Избранной Воеводе и Попечительнице града сего, многие чудеса от иконы Ея приемше, восписуем похвальная Тебе, Царице Богородице. Ты же яко имущая власть спасати души наша, от всяких нас бед свободи зовущих: радуйся, всем мира Утешение.

Величание

Величаем Тя, Пресвятая Дево, и чтим образ Твой святой, имже точиши исцеления, всем с верою к Тебе притекающим.

Внимание!

К празднованию 100-летия пребывания иконы Божией Матери "Песчанская" в нашем Николо-Иоасафовском соборе (в левом приделе), мы опубликовали

акафист Божией Матери на церковно-славянском языке с ударениями, также в эту книгу входит история иконы и её значение для России.

[Читать на сайте >>>](#)

21.12.2012 - проведена проверка, исправлены ошибки / Admin